

四庫全書

集部

欽定四庫全書

申齋集卷九

元 劉岳申 撰

碑誌

元通奉大夫湖廣等處行中書省叅知政事鄭公

墓誌銘

公姓鄭氏諱昂霄字顯卿世家鄭州滎陽里由高平公
宰輔州陽城縣十餘年寬賦興學盜不入境及代民遮
留不得去始為陽城人曾祖諱珪祖諱皋忠昌軍節度

使贈寧路總管高平郡侯父諱甫勇略絕人讀書善騎射以扈從征西有功歷尹陽城陽夏長子潞城平棘五縣有惠政于民同知潞定不從長吏加鐵冶之課改知邠州以邠告老贈廣東宣慰使都元帥高平郡公夫人宋氏路氏皆有賢行公其冢子也初公伯父潞國忠肅諱鼎用莊靖李先生太保劉公薦扈從西征南伐有功嘗負世皇度雪山擁世皇度金沙河世皇深嘉其忠而戒其驍勇以平陽太原萬戶戍斬黃移戍鄂州竟以戰

歿樊口子澤國忠宣公制宜襲尋授樞密院判官湖廣
叅政以叔父延瑞襲延瑞老不任以公襲公始宿衛世
皇至是以萬戶從征八番順元反者破諸寨勦郡蠻斬
賊首宋隆濟酋長阿女以懷遠大將軍進定遠大將軍
從征安西徭獠斬賊首梁君政等以中奉大夫廣西兩
江都元帥招撫右江復其城郭人民有某萬戶以公陞
擢授公職公重棄祖父勲名辭元帥仍受萬戶會西徭
賊復作有旨出征以奇珠左丞及公督師公即日就道

馳至慶遠等處設方畧涉險隘抵賊巢燬其室廬倉廩
獲其首從會有旨原其悔罪者因諭以禍福降其洞寨
八十五處徭賊二百五十戶男女八百五十口器械數百
餘盡完聚其所掠民男女班師以還天曆元年九月授
湖廣行中書省叅知政事有旨領平陽保定兩軍近黃
河屯駐聽調尋授行樞密院副使戍虎牢扼潼關以禦
西軍西軍潰旨還京賜銀鈔辭不受明年二月旨授通
奉大夫以湖廣叅政事領軍思播征蜀臨遣賜表裏衣

甲子刀三月至自京師始還署三日即發湖廣四月播
州石虎關蜀軍潰六月至自播州以疾辭中書勉諭毋
勞謙退而公常不安席八月知貢舉公力疾留貢院誓
天為國得人竣事士論歸之長貳僚佐日請還署而公
以疾竟不起九月二十七日也享年六十夫人郭氏封
高平郡夫人子濤宣武將軍襲萬戶鎮武昌嘗從公征
西公之初薨也夫人與濤俱慟絕久乃復甦濤妻范氏
侍姑從夫竟以慟絕家無以斂治命還葬濤以某月某

日葬其鄉某山從祖父之兆以余嘗校文知公公又辱知泣請銘曰先生以試士來湖廣殆天以不肖孤恩先生而揚其先美蓋其遺脩也敢泣血稽顙以請伏地者久之余惟鄭氏自其祖父父兄世樹功勲而公又備著忠勤顯有勞績親結主知歷位叅樞而謙退不伐是宜富貴壽考而家無遺財年僅中壽有令妻賢子子婦又孝是可銘也已公治兵有法臨財廉臨陣勇平居愛民下士其忠心誠實厚有德君子也銘曰

天祐忠臣以興上聖上聖龍興克篤其慶維茲鄭氏勲
在上心祖父父兄式克至今忠肅之忠忠宣之勤高平
再世膏澤下民以名將子有循吏風子又克世王臣匪
躬戰不辭難功不居寵惟儉惟勤將懼將恐妻賢子肖
曰公家教無財無悅有婦死孝見者盡傷聞者感歎至
今荊州四境猶晏昔歌凱還今哭還葬風號天旱雨泣
歲旱國有恤典史有易名庶足徵者不在斯銘

有元隱君子冷正叔桐鄉阡碣

自余聞分寧冷正叔為義田以仁其族遠近無所然罕有言其為之有本而行之有序者若其志節之盛行誼之高則世有未必知也余讀周儀之所為狀而悲之其狀曰正叔十歲試宋童科以文武藝冠一時遂免解少長即慕古人問學以當世自任及寶章捐館章貢家難國亡正叔間關千里以喪歸終喪有聞即絕世念用孝友為政於家不逮事母事生母黃孝謹居喪校楊氏附註家禮可傳於世事伯兄常如未昏宦時仲兄蚤世教

育其遺腹子至於冠婚如其父未亡季弟為人後者友
之如未嘗後人方義田之未成也族多不舉子有不娶
者有流落無死所者及義田既成族無不舉子男女無
無室家者矣有過五十而娶有子者有六十始育八十
而以天年終者有老且死他邦不遠千里而來歸者有
濱死而生者死而得所歸者然其法與文正少異再嫁
者削之守志者倍給之壯能自食其力者量給之離族
者削之無恒心者削之又皆有意然後次及親黨隣里

又次及故人遠客無不隨事多方各用其情嗚呼可謂難矣今之讀正叔詩文者但見其雄渾雋永而不知其為顧行之言又不知其躬行皆過其言之行也蓋至於疾病且死不亂而後知之使正叔遂行其所學必不顧遺餘其才志事君有如不幸必不苟以謀其身與其家其功施豈止族里言行又豈止耳目所覩記哉正叔嘗被命湘鄉縣尹不赴有書義田事於郡志者命急去之曰此先世善慶之積先公賜祿之餘某何力之有正叔

諱顧孫世為豫章分寧泰清里人系出周世宗時淮南
租庸鹽鐵轉運判官嘉魯祖諱某贈奉直大夫父諱某
宋朝議大夫直寶章閣廣東路經畧安撫使分寧縣開
國男食邑三百戶母宋氏王氏俱贈宜人生母黃封孺
人娶周氏宋瑞州使君周公某之女先卒子男三有泰
以海南北道憲司帥府照磨管勾知名有益以文學聞
有觀方學父兄之學女六孫男十女五曾孫女一生宋
寶祐丙辰七月二十八日卒以泰定乙丑七月三日明

年丙寅某月某日葬武寧桐鄉余友羅以通郭公晉能
讀六經四書與君深友言君平生與儀之令狀畧同儀
之有文學政事瑞州使君才子也余悲君才志不獲展
而言行不多見知君者又不多死之日自吾鄉會哭者
其色容必哀比葬自吾鄉會葬而求余文者其辭尤頌
至是可銘矣有益請銘以揭於其阡乃揭之曰有元隱
君子銘之曰

士不用世則必附驥世非不用而驥不至自淑其身以

見古人古人不作不朽焉作不尚有聞嗚呼此其墳

余士南墓誌銘

君諱湘字士南世居永豐之故縣相傳其先自撫州徙
士南幼孤昆弟三人二昆既盡亡其故祖父遺業士南
始折節讀書始變始躬耕五畝之田以為生終三時無
一隙其法以深耕勝廣畝畝常收二畝半其後田愈益
多墾愈益勤又以率其同社人以為常不率者輒為之
耕尤善畜牧魚可計日滿尺牛羊隨地輒成群種樹有

法被服其家爰及鄉人取材手植以為居室用器皆中
尺度二昆所棄故業身盡復之至盡然終身儉勤不改
或從之貨不厭或請夷山逕修江橋不卻常恨人心不
盡得我以濟每被誣輒厚費然財輒日益蓋天與之地
常遣其孫來學命之曰不耕則學勤乃有獲有如惰農
同奏罔功又曰吾起耕稼是謂本富末富如倚市門姦
富如殺越人雖積數鉅萬不願汝曹效之每誦其言嘗
過其家門外多役水為春連晝夜聲不絕機杼聲聞於

外與書聲雜里有龍塘產嘉魚過者輒以盜論君得之而施其禁以享先祖以羞嘉客即止嘗自謂終身用物皆身勤力所自致然至老死不敢過亦可謂賢矣曾祖某祖某父某生宋辛亥終大元太定丁卯正月十六娶羅繼劉子男某孫某咸來請銘銘曰

自古王政必先樹畜莫重省耕其次考牧頌有載芟雅有無羊周人以興卜世以長降及秦漢漸為賈區始禁賈人衣系乘車古風又降降及近代姦富爭雄盜憎民

慙惟茲歐鄉庶幾余氏孰令而行孰禁而止苟非其力
不食不衣終身衣食惟恐過之率其鄉人教其孫子續
古之人以續以似我銘此墓以易俗故世萬子孫勿替
斯文

元奉議大夫吉安路吉水州知州驍騎尉永豐縣
子孫君墓誌銘

延祐乙卯贛寧都亂微孫氏寧惟寧都不守贛不支廬
陵亦曰殆哉初江西經理白糧民不堪命贛為甚寧都

又甚有蔡午玖者因之脅從其鄉以叛而從之者三鄉
同知趙某遇害自七月朔攻圍州城十有四日城守堅
稍退復進後八日圍城數重朝廷命三省討賊聲援稍
集而飛芻輓粟不繼孫氏悉其牛羊倉廩府庫以備供
億又多設方略以家僮民義先官軍衝冒萬死力戰潰
圍又八日而薄諸河踰月而拉其巢又踰月生擒午玖
而後亂甫定當城中食盡時危不能朝夕城不陷兵不
潰衆謂孫氏力為多而終不言功則孫公有大德於其

鄉也事平命下旌其門方事之殷有謂公盍盡室去諸公怒斥言者賢內助尤贊公急毀紓嚴守禦逮糗糧多芻茭具脯資餼牽則其鄉人人能言之公真德人哉余每恨酷吏妬財常疾視富家有盜憎主人之意不思凶年勸分倉卒守望即有大調大徵發致期取其將屬之華門圭竇之人乎繩樞甕牖之子乎甚矣其為臣不忠也於是復見至元丙子距乙卯二十有二年矣公之訃至廬陵而思公者如新公之子寶孫以州判官張本所

狀世系功行因余友周某求余銘余素聞與人之誦又
嘉寧都大夫之賢誼不得辭按贛寧都在唐為處之處
化狀稱寧都孫氏自唐中書舍人拙避亂徙家處化始
中書五世至宋桂州節度使判官立節嘗抗丞相不為
條例司又嘗奏論活十二人於死蘇文忠稱之為剛者
必仁其子勰勸從公遊勰歷官至岳州使君岳州六世
至興禮以子貴國朝追封登仕郎撫州萬戶府經歷公
其仲子也諱正臣事登仕府君母曾氏宜人備極孝養

府君即世五十孺慕繼志終身貧者待其養生送死大德丙午丁未大侵賑其州及于豫章于金陵他如鑿山通道彼沮者夷使盜失據為梁為亂必有菴田使民永賴嘗修鄉校以為國育才又即京師鑄寶瓶于廬陵塔寺於其鄉建經閣為華嚴院以為天下祝聖人壽仁皇在宥擢寶孫少府監丞制封公奉議大夫吉安路吉水知州驍騎尉永豐縣子夫人陳氏永豐院君泰定中賜酒咸寧又賜命服及帶公鄉大夫咸為歌詩以餞優游

家居享壽康之福者又十有二年而以至元丙子八月三日終於正寢得年七十有六鄉人哭者皆慟部使郡守而下致奠尤哀子男三寶孫今為護聖營膳司令伯顏大司農司語官鼎龍興平準行用庫使先卒公命以弟師為之後女三長壻吉安萬戶郢貫先卒孫男五赫師大司徒宣使孫女五曾孫男一女二治命葬懷德鄉心化里竹龍橋余今年始識司令愛其寬深博厚又聞其平反西京寃獄七人公喜形於色奉旨修光天殿廉

省常費數萬董營大剝省費十餘萬故有營膳之命乙亥冬馳驛覈田計賦奉常先帝祠廟明年春至廬陵聞公疾馳歸而公疾愈先是伯顏以叔出季處辭朝還侍至是與其兄嘗藥進膳者又五月而後公卒非厚德盛福不及此嗚呼公之德足以似續其先人而化又行於妻子不賢而能之乎銘曰

善人為政使富者仁凶人在位使富者貧民苟貧矣將焉用之無所用衆國何以為惟茲孫氏惟德是種是其

種德已歷唐宋朔南教暨雨露恩深使縱尋斧安得至
今年飢誰望寇至誰伏兵興誰飭城守誰仰天助皇家
亦右富民蕃祉老壽以活鄉人活人多矣何以報之民
之所好神之好之相其子孫永仁無已嗟爾鄉人子孫
二子少者携壺老者扶路年年寒食來祭公墓

彭魯叔墓誌銘

安城處士彭君諱絲字魯叔江陵府君長子也府君學
行不可少愧古人既第恨不及養不就祿不忍言挂冠

嫌以本忠歸訃當世世既變始益杜門裹足著書以終其志魯叔與弟長庚用著述為幹裕修踐為孝養切偲為怡悅作小學進業廣記廿卷補救人心世道未舉九章算法恨未盡念周大司徒設教與賓興賢能九數其一自劉向父子班固鄭康成皆通其義前代置博士科目百餘年間曠不復講今其書固在悉本禮經中雜秦官制算術如科條疑秦漢間人補綴然苦難讀乃取二百四十六問為註疏圖名曰算經圖釋凡九卷勾股少

廣畧積最隱互者最有功始悟禮經八十縷為升乃由
經緯各八十積六千四百縷為方一升殆借良法以明
度法合稟氏為量方深一尺之義與算經合由算悟律
於是黃鍾樂律不定千五百餘年矣法圓經畧積最難
惟祖冲之密率最而未嘗以筭黃鍾惟蔡季通候氣法
最善而未嘗得算法徒以圓田術乘除約之故于律孔
經為疏宜用蔡氏候法而加以祖氏算術用圓周求徑
徑定則積實亦定乃作黃鍾律說凡八篇自謂神夔復

生必有取此嗟夫季世士大夫高科厚祿晚致為臣歸
見孫曾四世不知平生學問曾不如古人十五歲以前
而父子兄弟間可愧憾多矣況論及物哉嗟夫魯叔父
子豈有一日民社之責而常懷萬世太平之心良由俱
存無故俯仰不愧用意常在千載之上千載之下嘗輯
八先生書說槩取諸周程以下府君定著纂傳多所取
焉嘗謂易潔靜精微之書無事不包不當拘一事一義
故其書曰易包春秋春王正月實建子本泰誓十有一

年春一月自武王已改時改月攷國語及唐大衍歷皆合此夫子所以欲有行夏之時也故其書曰春秋辨疑禮記有集說四十九卷前無此書已多論著猶未脫藁府君當之江陵有為疏廣效子孫計者則對客人各有志清白遺子孫不更勝耶先廬偏仄有操書致者則白府君以無故之恩必不可受梁伯夷所築亦不可使伯夷傷惠府君三遷而至黃山有屋山之警請必治之以為小懲大誡乃人之福今不懲將不利鄉人小人亦終

凶于其身置之理而其感悟卒為良民門外雪深數尺
猶執筆細書不輟病中齊叔曲臂之則吾生平多憂顧
憂貧若病哉吾父著書滿家吾著書數種今吾已矣將
其在吾弟乎張也汝必勉之嗟夫使魯叔得志必有被
其澤者然不可得魯叔不加損而民之無祿哀哉將其
在後之人乎曾祖某祖某父某宋江陵府教授鄉先生
太學博士劉辰翁私謚為端素先生妣羅氏娶劉繼劉
子男通孫先卒以弟張後之女四婿周某某劉某劉某生

宋嘉熙己亥四月十四日沒大元大德己亥七月二十
五日葬翔鸞鄉府君墓側張求余銘銘曰

文富無貧良貴無賤苟不怨尤又何歆羨義理密微必
辨其非象數隱互必求其著禮樂有興丘厚無起茂陵
有求空谷無似吁嗟魯叔其人如玉暴之天下以俟來
者

湘陰知州崔架之墓誌銘

余平生老友崔架之質直方正天性好誼誼至高尤惡

薄當世者常欲挽天下熙熙攘攘皆回心而鄉誼甚盛
心也喜賓客至傾竭接脫妻子所服飾質貨以供燕勞
贈賄以為常人人滿意去不知架之故無宿春聞人有
急暮夜馳赴不一語家人尤恐後事已不歸德故信義
士也架之諱棟世為晉寧絳州翼縣人系出唐國子博
士駉弱冠試吏江西鈔提舉司行泉府司理問所知名
提控富州安福州撫州路案牘名益聞歷大都人匠都
總管府留守司少府監知事陞監經歷改留守司都事

經歷瑞州路省臺交章不報授天臨路同知益陽州事
年六十九以奉議大夫天臨路湘陰州知州致仕架之
有守有為常思奮不顧身以脫人於險其素所蓄積甚
于人所嗜欲常從韓理問多方白員主簿實不與賊通
員得不死瑞州日飯施縣丞又代輸其誣服之臧施得
不以餓死鞭笞死皆人所甚難而意不滿不能力爭省
憲脫二人於亡辜西師興益陽當轉輸播州徃復道理
六十判官當督餉故墜馬竟辭行架之屢請身督餉救

四十萬軍士饑欲死者父老遮留不許至常德而蜀平班師架之亦還治則天也益陽有故監縣太原人無子而家貲鉅萬諸壻二十餘年不決架之遣吏其鄉訪求得其族子當為後者而訟為息此居官理余所知者也其間居有鄉人遠服賈于洪失利而病且死自言識架之實未嘗識聞其名居則曰魏仁鄉為謁醫治病病已又為稱貸以資為賈乃好飲盡亡其財脫身遊高安竟以責累架之他日其父携孫來求亡子以父命召之不

至父歸置其子崔氏久之仁卿以疾病來八日死架之
為買棺以葬又教育昏娶其子焉嗟夫薄俗多藏厚積
遺所不知何人而塗人視其親昆弟於其族之人與所
厚昏友棄不遑惜者皆是也而况素不識人者乎架之
豈不誠賢士大夫矣哉使架之蚤從州縣徧歷省臺當
使所至風移俗易人人耻為薄夫鄙人豈不世道人材
亦職有賴而卒以滯淹老死下位與架之同時共起在
高位者多矣能進退人材者無餘責乎孔子稱下展禽

為不仁又為竊位可勝恨哉架之死元統甲戌某月日
年七十有一矣非不得年也娶常氏封宜人先四年卒
實賢內助子男二思誠國學生累官至承事郎廣州路
番禺縣尹次思立女二婿鄭文煥張顏孫男四葬某所
以某月日銘曰
無不知已孰蔽其賢無不俾爾又假之年而止於斯於
乎架之

元承務郎江州路彭澤縣尹姚君墓表

元統二年秋七月監察御史姚緩將旨東粵道出廬陵
過余衡門之下再拜以請曰緩之先人彭澤府君葬鼎
湖祖墓翰林學士臨川吳公既為之誌以賁之幽惟是
葬十有六年而墓上之碑不刻立無以彰示子孫敢請
序次而論之曰府君諱某字敬甫其先河中人有仕金
為號州某官者遂為陝人考諱某監陝州酒稅贈某官
敬甫由廣東宣慰司歷南陵簿劉莊鹽丞長陽尹采石
鹽引提領授承務郎江州路彭澤縣尹未上而卒于真

州之寓舍初廣東富商有被強盜而誣服其仇者因賄成之宣慰有入其語者所連三十人寃死獄者已十一人餘皆誣服然終無賊仗會歲終改隸敬甫得其寃狀以聞于時廣東論囚不俟報宣慰命十九人皆致諸辟敬甫廷諍安有賊仗不具而人可殺者即死不敢奉命宣慰大怒愈益急趣則抱牘踰垣走匿僧舍後五日梅州械送正賊賊仗俱備敬甫引十九人破械而廷釋之十九人羅拜歡呼曰生我者父母再存我者姚敬甫也

當時敬甫不以活十九人自多而以十一人不可復生
為恨夫十一人者不死于敬甫之手明矣而敬甫猶恨
之於是廣東之人皆知敬甫非沽譽真洗冤者也或曰
五日十日賊不獲奈何曰五日而賊得天也苟惟不得
敬甫遵海濱而處可也何以帥掾為自是廣東凡獄成
必由敬甫先後所平反無所惜也彭澤之人不與被其
澤而敬甫之施已狹矣敬甫之施雖狹而南陵長陽之
人有陰受其惠而不自知者若劉莊采石受其寬分之

賜者尤多士大夫苟為政何必赫赫之功哉此敬甫所以有後敬甫死時年六十有六矣綬之弟曰紳今為某官嗚呼為善無不報而敬甫初心豈望報哉天之報施善人在身者有顯晦在其子孫者有遲速未有或爽其應者嗚呼姚氏世子孫勿替引之哉

倪處士墓誌銘

白下有處士曰倪君景和修于家教于鄉自其子若孫與其家之群從子弟其鄉人子弟從處士講說六藝四

書人人忻忻然如得美食甘寢處士死皆悵悵如有所失如無所歸皇皇焉如不可一朝夕處士常語學者孟子稱堯舜與人同汝知所以同者乎知此則知性矣又曰孟子距楊墨不過閑先聖之道佛者以其說鼓行於天下垂二千年儒者所憂不當在我乎又曰孔子稱志士仁人有殺身以成仁宋亡惟廬陵文丞相一人而已聞者悚然不敢自名讀書為士其子存遠與余遊方將從處士求一日之益而處士已矣處士其先自金陵徙

歷宋崇寧靖康至渡江百餘年高科顯仕知名者尤多處士浸灌于其家學也深故其論議絕去鄙俗亦無倍道其徒有楊景行者為延祐初科進士歷官有守有為今為宜黃縣尹尤能其官以處士族出學行求銘於余余謝不敏而再不獲則告之曰余不及與處士交際其數學之詳吾不能知大者如此他可略也以是銘處士可乎景行復書曰是足以銘吾師聞於來世矣處士諱某字景和曾大父諱可功宋贈朝請郎大父諱千齡宋

朝奉郎父諱韶孫宋咸淳庚午貢士娶劉子男一齊慶
女二婿某某孫男四曾孫男二處士卒以至順辛未二
月二十七日年七十有五葬鐵溪浮潭以十月十九日
有文集三十卷講義十二卷隨筆錄三十卷藏於家銘
曰

倪入春秋自犂來始去邑從人見公羊氏千乘者寬為
漢御史淮海其裔金陵再徙崇寧良翰八行之名靖康
死孟死扞京城父曰師尹子曰求已倪氏世科莫盛於

此灼守南康立身英德維二史君聲實輝赫至於處士
成德道尊南康群從英德諸孫世美其家惟德之華成
教其鄉于道之光亦有才子克濬其源亦有進士不辱其
門天將報之俾厚其施施常恨少報豈曰小斯銘斯墓
母或傷其樹嗚呼倪氏來來無止

彭齊叔墓誌銘

吾鄉先進惟安城彭氏父子兄弟自為師友能自致不
朽鄉先生劉公會孟為端素先生謚崔君舉為魯叔碣

既各取其傳者傳之於是齊叔死十年而前修遠矣其子彞始屬筆於余余固辭彞固請謹按端素先生宋江陵府教授諱應龍字

闕

夫長公諱絲字魯叔其學如

古所稱博習修潔者殆過之齊叔諱長庚能繼父兄志業不苟同先儒不苟異流俗不苟難鄉曲無不及古之人已然未嘗以尚人余猶及一識恨無由極論獨從鄉評家傳彷彿生平忍不與四方學者知之其可乎齊叔不用世而學必不可為無用不學為科舉而科舉與必

不可廢其學嘗稱父兄著書務明千古是非不徒觀衆人耳目恐不幸萬有一佚墜先父兄遺緒謂文公於四書集衆長而無我意權度精切矣然且更定猶終身不置其意豈無待於後之學者故其徒黃直卿真希元於其師說而有新意學貴知新以此非為異也作四書辨疑然後辨疑春秋禮記周禮辨詩易書下至諸史律厯太玄潛虛皇極叅同陰符皆有商論名為萬卷莊日記又以春秋辨疑未盡復作春秋集傳槩謂漢儒以濟北

王而稱春秋是蔡仲以衛太子而稱春秋是衛輒以昌
邑王而稱春秋出襄王晉人附賈后誣廢揚后而稱春
秋是魯莊絕文姜幾以惧亂臣賊子者為亂賊勸深著
其非是以教世子為天下國家本作春秋坊百鑑鄉里節
士烈女恐久遂湮沒作廬陵先賢傳後世用法徵例本
呂刑上下王制小大漢律決事皆有比致吏胥所欲活
傳生議所欲陷與死比定先定法尤先任人當擇守尤
當擇令官吏不過三歲而土人在官無祿者封建其間

樹根深固窖刻骨髓宜痛斷根株絕之而定其錄三歲
一易群縣歲上計簿宜知戶口滋耗占吏治得失其窮
居憂愛至豈迂儒瞽生懵不通知世務者比哉平生說
經有得其說者因而成之如向秀於郭象然未嘗自言
戒諸子無敢言或畔去重來見之如初蓋惟恐不成人
之美真古之人也古之人也嗟夫齊叔其所樹立可必
傳無疑何以余為哉曾祖某祖某父江陵府君母某氏
娶某子男某女適某生宋淳祐庚戌三月朔沒泰定甲

子五月某日吾友真定范濟鄉清白吏亟稱齊叔樂貧嗜學無毫分勢利意以阨窮終其身是甘心焉是宜銘銘曰

有賢父兄吾難子弟成一家言以俊君子其鄉翔鸞其阡羅浮賢哉斯人樂哉斯丘立銘著其志以尚無愧

嘉興路儒學教授俞君墓誌銘

延祐科興余徃來塗學幾亡誦絃聲元統壬申浙俞鎮伯貞以教授來塗士稍集然每試得士又如未嘗廢業

者隣州縣往往亦響應伯貞與余遊間視余以其父嘉興教授壙志請銘迺伯貞以延祐丁巳魁鄉貢至治癸亥季弟銳亦貢皆家教也俞氏以吳越睦州刺史稠世家汴至宋殿中侍御宗古始家杭曾祖宋迪功郎諱應龍從兄樞密文惠公應符尉嘉興府崇德縣始家縣南南津鄉通賢里祖諱儒宗考諱國梁君諱天民蚤擅詞賦尤工駢儷至元丙子大疫大父父不幸俱至大故祖母劉維卒君奉母梁夫人治喪終喪而家事益治始

遷縣甘澤坊為奉親教子地翰侍講學士鄧文源善之
其久交也君遣子鎮等從之學家素寒而喜賓客尤睦
族姻下帷友教諸弟子以樂其貧歷主一永嘉兩書院
長以嘉興路儒學教授致仕命未下而卒至順庚午三
月也年七十有三娶徐氏先卒子男五鎮楸鈞佳銳楸
佳先卒銳衢州路儒學正女三婿葛瑛陸其揚祖孫男
四女十二往歲宋亡故家世族多流落君侍御樞密之
後能家教不隨子孫與科俱興身教可知已鎮以至順

癸酉合葬其考妣通賢故里銘曰

繇汴徙杭繇杭徙越遷國以亡興家以勃侍御之世樞
密之家通賢里第有韡棣華惟志尹甫教子世科我碣
其藏華山其阿

宋戶部尚書贈端明殿學士宋忠穆公墓誌銘

宋咸淳德祐間士大夫有官守有封疆有師徒之衆委
而去之者多矣不去者以媒其身國已破閩已潰而相
從航海以身殉焉而後已非知其不可而為之者乎吾

見罕矣故戶部尚書贈端明殿學士謚忠穆青城宋公
真其人也公諱遇字安序眉州青城其先唐宰相璟之
後世居荊州廣明之亂扈從入蜀因家焉公登紹定壬
辰第歷官黎州教授嚴道縣主簿監郡大司尤溪鉛銅
場官滿因家南劔知彬州宜章縣監行在和劑局提轄
文恩院司農簿軍器大監司農少卿大卿戶部侍郎福
建運使權戶部尚書兼侍讀終戶部尚書常營臺池植花
木扁老圃為終焉計詎家七里所劔津上洋為先世祠

象築塋墓時乙亥歲也明年閩建行都從行都閩亡明
年行都航海從海上不幸以病終於化州吳川縣之
硃州實戊寅三月朔夫人杜氏同日死之行都命合葬
于縣之浮流樞密張公世傑陸公秀夫奏贈端明殿學
士謚忠穆方公之家劔也以都大司屬官嘗活饑民官
滿民懷其惠而留之為宜章日有寇以強糴獨獬飛虎
將軍不能支公單騎往諭之曰汝等以貧無食富者又
不仁故至此當盡發常平以濟不足則以官會繼之既

與約曰又椎牛醢酒以勞之皆投戈羅拜而去既去發
常平用官會如約嘗侍經筵盡心啓沃居從班盡誠奏
對知貢舉籲天祈得士無不一用其忠志誠不忍荷國
厚恩身被顯擢坐視國亡而家再造苟完且萬無完理
決起携家夫婦同日并命荒洲之上與海舟俱淪沒以
終嗚呼如公者可謂不欺其志矣生宋嘉定戊辰沒宋
亡戊寅年七十有一曾祖申承事郎祖丙迪功郎父景
瞻中奉大夫子男某宣義郎大社令女嫁某人孫男三

大社以兵後理墓田修祠宇如初以世好遠徵銘謹論
次其槩如上而銘之曰

嗚呼宋德天而既厭誰從日月未光絕炎烈烈宋公桐
鄉南劍浮海去之僊聖在念婦從其夫同日就歛朝有
易名以死猶艷嗟時之人寧不有歛劍有土田洵也不
僭劒有子孫祀也不忝我作銘詩以望公封

音去聲

慰我

永懷公則何欠

王遵墓誌銘

汴人王誠仲敬喪其兄子遵于廣文之官舍夫婦哭之
慟耆老諸生不忍聞三日殯于佛寺哀動路人有不忍
觀者始余聞遵讀書金陵學舉子業父母愛之諸父愛
之仲敬尤愛之以廬陵多士使來卒業比及三年而歸
父母見之何如其喜也而未及數月以喪歸將何以塞
其父母之悲此宜仲敬夫婦所為哭泣悲哀不自勝者
也遵將歸葬仲敬泣而言曰誠不忍吾兄見此子之生
行死歸安得先生長者賜之一言是使斯子為不朽而

吾兄為不恨也且不虛來廬陵不得誠不可以為人
弟敢告又曰誠兄弟八人遵在諸子中最長且賢不肯
一日去誠以媼而乃從誠宦學以死也傷哉乎遵敢請
余感仲敬克友閔遵不幸乃叙次而銘之王氏繇濟南
歷城徙家汴考城繇歷鵲山徙葬城次岡贈朝列大夫
同知汴梁路總管府事都尉太原郡伯諱興其魯大父
朝列大夫廣州路總管府治中致仕諱或其大父登仕
郎大平路總管府知事諱其父母劉氏聘劉氏遵字克

勉生廬陵以大父大德丙午判安福州之歲死廬陵以
季父至順庚午教授之歲十月二十四日也年二十有
五以某年月日葬某所銘曰

生於斯死於斯銘於斯其魂氣無不之也其死而有不
漸者矣



申齋集卷九

欽定四庫全書

集部
申齋集卷十一

評校官中書臣李彤

侍讀臣孫球覆勘

覆校官中書臣宋鎔

校對官中書臣袁文印

謄錄監生臣吳銓

欽定四庫全書

申齋集卷平

元 劉岳申 撰

碑誌

廣西宣慰文公墓誌銘

文氏繇成都徙吉之永和繇永和徙富川公諱璧贈太保邦國公諱某之曾孫贈太傅永國公諱某之孫贈太師惠國公諱某之子丞相以保信國公諱某之母弟也
皇元混一區宇得忠臣孝子於一門公與丞相兄弟二

人而已初公與丞相俱學俱貢俱第將入對太師疾病獨留侍丞相擢進士第一至開慶己未公始對賜第授迪功郎臨安府司戶叅軍以致稱用京尹馬公光祖舉改官知瑞州新昌縣錄大獄二十餘皆得其情正宗室子嬖妾殺婦之罪決盜牛訟久而不決者縱牛牛歸故牢而盜服由是新昌訟牒不入郡青匱方議興學校救荒定役法而以言去簽判寧海軍通判臨安軍府稱治辦浙西安撫司升置制主管機宜文字司存改制置兩

浙主管官告院仍舊職舉取丞相開閩江西奏以公為
助得主差主管書寫機宜文字事無大小必由公議而
後行丞相趨朝乞祠留侍除直秘閣主管台州崇道觀
尋有旨差知惠州尋升直寶謨閣知海州軍州復由兵部郎
提點廣南東路刑獄樞密使陳宜中都督諸路軍馬以
將作監叅議其府事多所裨畫至行在所時暫兼權樞
密副都承旨尋除秘閣修撰樞密副都承旨江西路轉
運副使陞兼叅謀尤多密議除權尚書戶部侍郎總領

廣東財賦兼知惠州丁齊魏國夫人憂還葬惠州哲言墓
終身尋累詔起復除寶章閣待制依舊任兼東廣招諭
使叅贊都督軍事又除權戶部尚書偏側兵間兼運籌
給餉於危急存亡之秋所謂鞠躬盡力死而後已者明
年丞相敗海上公始圖全宗及丞相北行公始入覲授
少中大夫惠州路總管兼府尹尋改大中大夫臨江路
授嘉議大夫同知廣南東道宣慰使司事改宣慰廣西
分司邕管念廣民兵後瘡殘凡可以救民於水火與衣

冠於塗炭者盡心焉以大德戊戌十有一月二十有一日終于正寢初丞相賦詩有云親喪君自盡猶子是吾兒又云三仁生死各有意至為文以祭太師之墓則云有姪曰陞我身是嗣公既命其子後丞相當丞相生死之際公所以為人弟者備極人所難為而曲盡其至自臨江即謁告之惠州改葬齊魏不獲則命其屬吏行不幸屬吏死循州有故吏總管循州者遣使間道護喪以歸公適至自南安孫氏妹至自龍泉不期而同日與相

會值夏方孫氏妹母子俱北多方謀所以返之者而後得與俱還彭氏妹病羸瘠魏尤鍾愛因迎養惠州與俱夫家破亡得免則養之終身經紀其季璋食其伯指盡復其所沒田乃已教母黨之子官其季明孺固其從弟妹之貧病與其喪葬養妻母杜及其乳母薦其兄子南翁官至大社令丞郡又教養其子維斗自廣西歸日不暇給以丞相前請得加封三代買先廬之沒入者命子隆子稍倣古制建家廟祠惠國而上永國邢國齊魏國

夫人而上永國邢國夫人以太師由伯祖而後太傅伯祖一子無後命子京為之孫又以太師本生梁夫人改造無後命為別室以祀梁以丞相常築別室山中又將買田創祠山中以方外人掌之教陞盡所以為人後者命陞迎母間關萬里生還首丘而公已矣又求丞相遺文而傳之梓尊視事太師之先友如父兄絕甘分一飯必俱尤愛劉正伯之子以恭與倡酬以恭與之銘語正伯曰公百歲後某為孝子家無宿舂囊無留帛親踈遠

邇畢用其情四方來者各得其所願欲而去死之日族
姻賓友四方會哭者盡哀如哭丞相之初娶曾氏繼張
氏子男五長某某官次某為丞相後某官次某某次某
女十有二趙良稗蕭米鄒止善廉璵燕璋胡桂周道
某彭震龍鍾齊趙法保黃與愚朱元順其婿孫男四某
某某某女某葬某所余從今集賢直學士受字都所述
家傳徵余銘余惟公之孝弟為人所難與丞相大忠並
傳其從兄盡力兵間易世盡心遺民還歸盡情倫紀皆

可書孔子曰殷有三仁焉後有君子之論而將曰宋有二仁是宜銘銘曰

東南道學垂三百祀科目以來孰厚待士歷數有終精一不已報以忠臣報以孝子猗歟廬陵盛哉文氏

解上舍墓誌銘

解氏族出鴈門繇唐同州刺史琬始以魏州先城著其孫隱為蘄州司戶叅軍家于廬陵縣司水鄉叅軍六世孫盛始遷于今吉水古東門坊科第常不絕十六世而

至公公諱夢斗字孔賜曾祖叔達祖寅父谷宋淳祐己酉壬子江西貢士母王氏以公入學恩封孺人公生宋端平乙未弱冠喪貢士君事母至孝事兄如父業進士有能賦聲尤以唐宋故家自持恂恂有士君子之行景定甲子貢於鄉咸淳戊辰入學庚午再舉于監名卿大夫皆愛其文而敬其有字京學賦六月共武之服有以公賦中者賦傳相國賈似道取其賦讀之至四郊無往以非秋六月不知其為憂惡其語有多壘之憂擲之地

然賦益傳他賈其餘勇者尤多癸酉以母憂歸居喪有
聞終喪代遷杜門讀書教于家必以身教鄉人子如其子
二子謹飭能世其業申叟常教萬安縣學辰叟奉省檄
教永安縣學公每飭之曰教然後知因此汝學時也又
聞科復又曰吾家世科數百年汝曹無慮見黜於有司
慮于鄉黨朋所黜爾聞者皆以為訓諸孫林立競勸於
學公平居退然若無所有非賢者莫能識不為厓異而
有所不為終不可奪寡言笑不妄交遊所與厚終無間

言與鄉人處終身不失年垂八十猶不廢數學及門之徒見其終始嚴重稱之莊山先生以皇慶癸丑十二月丙寅終於家死之日鄉族姻友無稱其過者娶蕭氏生女三繼鄧氏生男二應辰應申女一孫男八女三曾孫男一延祐乙卯十月甲午葬於鑑湖叅軍祖墓之側先葬徵余銘余惟代有陵谷則有負乘慮無不一蹴可致者惟喬木不可一日為自唐宋至今七百有餘歲而譜不絕世不失於士祀田不易姓者惟解氏非樹德不及

此使其子孫徒食舊德亦不至此嗚呼鄉里孤白眎公
何有由公眎之竟何如哉銘曰

衆誇毗獨也靜衆回適獨也正歷八代惟一性世子孫
無改行永厥垂鴻厥慶

梁先生墓誌銘

余平生老友梁君景行有雋材負盛氣年未二十以詞
賦論策知名場屋未三十宋亡然科廢猶三十年不廢
程文君以材雄馳騁其間者亦三十年而君老矣科興

稍屈折從學顧儕輩少有存者嘗獨行踽踽諸老先生已遠悵悵無誰知己平生以學校為井田月費歲靡亦可比百石由由然安之年九十以終君諱節自號高峯先生在宋可擢上第然由景定甲子至咸淳癸酉已已不得志為鄉闈於是宋科終矣元興提學學官多用一時名士而君曾不可一奉檄於江西江西提學蕭禹道方欲剡薦君會禹道病卒廬陵太守杜侯元忠剡薦君矣而當其剡於家及明經取士不忍技癢猶一至豫

章望世聞而返衆謂此行豈不可雍熙二年梁灝哉不
過為鄉校博士訓弟子員以止豈命耶君材負恃傲倪
一時余少君十歲自段禹謨晏鎬民先輩名士一見稱
為我輩人君始與余定交又聞湏溪劉先生語始異視
終始六十年君我二人君為文老而猶雋老猶不亂良
由少年盛氣終不可除生宋已酉九月四日同年生者
多富貴人或至二品而君以賓師終於家實至元四年
戊寅二月二十一日四月某日葬廬陵青龍山梁氏由

長沙徙西昌子孫屢徙而至廬陵余見君城中五遷而至今寓舍祖某父某娶曾氏子男三女三俱先卒孫男三女三五十年前君哭長子某去年及哭李子淳至是其孫蕭孫徒跣泣血請銘銘曰

科廢恨蚤科興恨老老哭叔子忽忽必死天之生材竟何為哉何以慰之銘告後來

廣東宣慰郭公墓誌銘

余往來豫章四十年士大夫稱賢者必曰杜仲寬諸公

稱長者必曰杜仲寬以至省若憲從事之良無不以仲寬為賢且能最後聞仲寬東歸宗為郭氏而人皆稱其孝又聞仲寬以其官終而皆悲悼其不幸仲寬何自得此為人人哉仲寬諱恕世家蔡州曾祖某祖某父某世與同里杜氏相好故壻杜氏由是姓杜從公襄樊下江南積勞為省掾潭州遷江西見知賢相呼都克特穆爾嘗慮囚廬陵而安福有紙得偽鈔官起疑獄多濫無辜者有告被劫掠官故縱賊久而不伏反被困者皆立決嘗

救一老儒生以豪右下石且死立出之嘗罪一吏一巡
檢尤毒民者立罷出之時決獄數而放還者尤多永新
有坐仇家告變允死獄中百口垂沒入官者官繫羣盜
耄倪數百日食於市民者踰年民尤不堪盡放還之自
掾史歷照磨且十餘年以竅聞江西遷廣東帥府經歷
從家幕議其間蠻獠反側帥府暴怒幾危者屢矣由君
復安遷浙東制用院都司以儉出薄入為本悉去苛細
取贏之弊能使公私俱美除融州知州會中書賢相達

爾罕選委問彰德鐵冶淮東市舶等事設法除弊悉罷
行害利能使冶鑄便益官民漕運不為奸人所欺舶貨
市易遠人悅來功狀彰灼遷江西都事已熟江廣民情
益順民好惡江粵始俱安升中順大夫廣東道宣慰副
使僉都元帥府事始念本以郭氏後杜氏不忍杜氏曰
昌而郭氏曰微請復為郭氏如既得請益感激思効忠
以報念粵民疲於征輸而軍用益乏稍務寬民力而師
興亦不匱使君能待忠更粵人歌舞其賜者何限而以

一疾遽不起君始積年著勞績江右稍敗歷東粵然後
出幙府持旌麾庶幾行志澤物而來日已無幾不遇名
文詞必可傳者以傳其姓名將遂湮沒而已豈不益可
為痛悼哉君勇於為義而退避利祿乃其天性故廉不
為刻能不為暴民受其賜士懷其德猶有古循吏之風
嗚呼賢矣君生丙午某月某日卒以延祐甲寅四月年
六十有九葬其盆留祖墓之次實丙辰十二月娶杜氏
子男文炳承事郎吉安路永新州判官之官永新道出

廬陵徵余銘曰能以先人不朽者公也乃為之銘曰
惟天生物使之一本而大報本在其袞袞君為杜氏不
忍郭亡既貴且老弱喪還鄉杜氏有後郭吾其宗子孫
世祀吾祖其從維仲寬父克孝以忠粵民父老曰我郭
公惟我江西猶稱杜母匪杜之思惟仲寬父嗚呼仲寬
善無不報我銘好辭為來者告君子有子君子之澤庶
幾夙夜永永無斁

渤海郡夫人王氏墓誌銘

江西憲使信都吳公繹為廬陵太守之日見其子鈞於郡文學為劉岳申曰鈞不幸無母且三年矣子諸侯賓客鈞不得為博士弟子耻也敢請岳申辭不獲命公始為言渤海郡王夫人之賢曰王氏諱某同里人未嫁為賢女既嫁為賢婦太夫人甚愛之從余中書省斷事官兼寧王傳遷尚書省移江福安余之儉薄使余不以過聞至治三年自福移杭十二月二十三日杭大火余倉皇馳救馬軼王氏聞已即驚悸不能語明日卒太夫人

哭之慟為廢眠食初余兄寧王司馬早喪余嫂王氏白
太夫人請以其裝更聘嫂氏至是嫂亦哭之慟諸妾媵
喪女君者皆行哭失聲男五人鐸內供奉其下三人皆
先卒幼即釣也女七人存者為次女宜同適高瑞王氏
死時年四十八明年正月三日殯仁和城東余不忍其
不幸早世又湮沒無傳幸賜之銘以庶幾不朽惟夫人
以邦君之妻而不知有富貴一聞其君子履危難即以
死繼之其志節有過人者是宜銘以夫貴進封渤海郡

夫人銘曰

肅肅渤海爰自京都從官閭浙曰嬪於吳渤海之德自昔罕聞為夫君死如伯姬燔姑曰孝婦不貳其志世短存長長於永世君子有子勿替以引以徵余文以垂永永

蕭存遠墓碣

吉水虎溪蕭氏繇宋修職郎監江陵府糧科院諱來新以景定壬戌奏賦南宮第一與一時賢士大夫交遊見

稱長者教其子宗古孫甲叟俱為宋太學博士廬陵劉
先生高弟弟子宗古字如壘宋鄉漕貢進士甲叟字存
遠科院季子予五歲為貢士後七歲江南內附先生避
地其鄉竒其材曰如壘不死矣十歲先生撫之曰恨汝
不識江丞相以如壘為丞相客丞相嘗銘其墓故也又
三年而廬陵鄉飲酒按察馬德昌一見稱其不凡當是
時遊先生之門者一旦皆出存遠下及徐子方叅政江
西德昌以郎中重來存遠從先生見兩公兩公即署為

白鷺洲書院山長既滿除教授潯州路未至潯科院訃
至馳歸終喪調田州路自陳得改湖州路湖學復興授
將仕郎湖州路歸安縣主簿嘗考試誠江浙得士監杭
稅課得羨被檄委問得當然竟用當得怨浙俗以贓罪
誣人者為賒告有豪民為僧者尤善誣工賒以為姦利
用報怨避罪誣存遠又有疾存遠才名者顯為將直其
事而陰實擠之蓋深助僧者甚於僧存遠既受誣落職
為袁州路平淮行用庫副使三年不得代以疾去及還

舊職秩將仕郎潭州路長沙縣主簿而存遠以病請老
未幾死死時年六十矣始廬陵先生為古文祖史漢而
宗歐蘇其論詩為宋三百年間一人而已存遠既盡得
其微又博采佛老方技之書歷覽南北山水之勝而壹
發為文詞其詩尤工然家益落身益儉坐視妄庸得志
更用以資為嗤笑使人憤惋向微子能嗣業尚得為有
天道耶余少客虎溪科院遇我特厚與存遠語面相質
責不少恕然必極歡別久移書亦然去年過豫章見存

遠寓舍相視無言既去乃為余痛哭殆死別也娶陳氏子男二元秀元仁仁後其弟孫男二梓桂元秀求余文揭於其阡余哭存遠三世矣感其始終盛衰之際乃為之詩曰

天之生材夫豈云易摧敗毀傷惟恐不至盛時恨少多才恨富既老而貧積毀滋垢乃知生世無用文章我碣其藏以永其楊猶有鬼神在其後之人

亡室鄒氏宜人墓誌銘

宜人鄒氏世為吉水士族父諱天濟以試選歷洪進賢
贛瑞金兩縣文學嘗謂廬陵劉岳申同事鄉先生心遠
聶公吉甫故鄒氏歸於我逮事先妣周氏夫人十有一
年日飯夫人八十母兄殆及其老子童孫夫人鍾愛葉
氏姊以姊媚嗜酒不念家館之別室鄒氏奉吾姊撫吾
甥以志養養姑姊不幸蚤世鄒氏以嫁時服飾歛之夫
人稱之曰孝婦既婚嫁葉氏六男女男斗壽年五十有
六兒女四人而後舅氏於是夫人即世三十有四年矣

昏嫵隣曲之厚者皆曰鄒氏為婦孝而恭為妻順而正
為母慈而教五十餘年家無妖孽雞豚狗彘無歲不時
醬醢酒醴無歲不美人皆曰冲和所聚也未嘗一日無
客未嘗一語疾聲色而闕給家事常治死至元丁丑

三月三日二兒一女皆不及訣年七十闕父諸弟

姪皆哭失聲葉氏甥為服期以報余獨哀其蚤闕

長貧晚又厭其多病不俟同穴而溘先有可傷心者去

年以闕恩封宜人子男文昌文華女中嬀藍王振孫

女五季省八九

闕

適玉振之子思順八先葬二十七

日而殤葬吉水仁壽鄉東山之原戊寅四月初七日銘

曰

是為孝婦之墓世萬子孫春秋霜露其罔有攸斁

蕭象明妻李氏墓誌銘

吉水水以東其鄉曰中鵠里曰太原平居人李氏世積
忠厚至叔澄始大用儉勤起家身致鉅萬當路貴人聞
其名翰林大老誌其墓有子十人敦篤淳龐皆保家之

主其八子曰恒吉有女一人惟恭歸於廬陵城西蕭奎
是為今福建鹽運幕府之仲子南臺御史之聞孫瓊管
安撫之曾孫江西安撫之玄孫惟恭以賢淑稱於家聞
於族姻相攸得所而不幸不得年父母晝夜哭曰自吾
有此女鍾愛之嫁不離家今轉棄余族姻哭之哀曰此
女歸於德門宦族將以光昭李氏庇其宗黨姻婭而遽
如許凡妾媵之老者少者無不哭失聲是何二妙之不
相違而兩美之不可長也生泰定丙寅八月十六日沒

至正丙戌七月十三日年二十有一葬其鄉和常洲以
明年丁亥某月某日先葬來請銘銘曰

錦衾角枕兮歲行周松風草露兮幾千秋往者不可及
兮來者猶可聞嗚呼斯之闕

處士郭圖南墓誌銘

廬陵郭氏有隱君子二人曰靜山字仁壽曰正表字公
進其先有受業宋袁州史君劉公予澄者其學務躬行
心得不務虛高談性命以資淫縱為物慾不幸無用世

之日世亦不及用之以困阨窮獨終其身而不怨尤其
宗人有得其傳者曰處士諱適字圖南能決去俗學往
從之遊身備五福一門昆季子孫俱有相道陰隲之何
其逢吉也郭氏世家由汾陽王六世謫官廬陵子暉徙
麻江又六世徙南林又十世至南村翁諱曰正字士先
為德人君子夫人羅氏故名家有婦德母儀處士家有
嚴君難兄弟外有良師畏友以知其真知踐其實踐印
岡又多君子母家在焉有別墅講業其中用師說補獲

麟後六十年史缺文節要通鑑綱目刪繁禮書註疏集
傳程氏胡氏為春秋五傳又嘗講業蘄之梅川教子授
徒益廣進修會江西覈田議增賦處士上書廬陵賢守
馮公翼極言增賦不便不罷且激變守為白江西幸而
免然且賴寇起三省兵興處士言益驗復上書言荒政
宜鄉勸分以救饑莩官減繁以救流亡賦必從田役必
從義而後苛橫可寬吏知通儒民知教子而後訟獄可
衰使其言行治平可待守嘉予之訪求五世至十世祖

墓得十三墓於荆榛中割田以供祀事又割田立後

闕

仁壽於是仁壽死五十年矣方求余志如

新建素心堂其所居之左求余記為歲夜深坐念平生
無不可對越者旦起拜高堂祖禰子孫環侍賓友就養
下逮童奴無不肅給與客語竟日皆可家教世範所至
皆有花柳間意四時皆佳致卒歲皆優游之日遠近望
者皆曰神仙中人且死精神志氣無一語亂得年八十
有五曾祖諱襄然祖諱三傑先後娶羅氏皆賢子男六

長申孫先卒次虎孫驪孫復免生牛兒女三孫男十五女十七曾孫男女各一葬吉水仁壽莊山以至正元年卒已十有二月某日徵余銘余嘗恨四書行世而士大夫不諱言利士君子不嫌媚疾有可傷心流涕者如處士胄次氣象可常遇乎友人周宗孟錢遠復為余言處士功行甚悉處士常過淮淮士多從之游貴人有遣余入學其後父子皆知名處士易簀時子姪前數月皆至自淮族里昏友四方賢士大夫走集會哭皆失聲行道

咨嗟嘆息淮人聞處士死扶路悲啞有餘哀是可銘已

銘曰

善種穀者凶歲仍熟善種德者百年不足是故世德不
同世祿世祿難培世德難覆培有厚者無如其福伯夷
之樹伯夷之築茲基余銘過者必肅既固既安以似以
續

張士正妻李氏墓誌銘

李氏諱幼貞世家永豐為歐鄉歸于吉水南湖張氏為

故家張氏謨字舜申長者能使人分其富子諱淑字伯儀孫天陞字士正能無改行於其大父父士正以宋咸淳丁卯薦於江西轉運使宋亡家毀身死子幼盜起師興官饗吏毒常餉軍不給而航海交征當此時有奇男子無所措而李氏由中制外以常應變以福勝禍能自立於亂以保其孤幼余聞其公事畢而家事治田園不蕪而子孫不愚為外姪治裝必使得所外弟有弱喪而歸者既盡復其田廬又為之家室年八十有七以延祐

丁巳某月考終子男喜孫明孫喜蚤世孫男文行女五
又明年葬於某處又一十年文求余銘余感張氏由長
者至見翁四世而復為豐家至文五世而尤為才子子
又有孫殆天報之也是宜銘銘曰

詩歌女士從以孫子家國之興靡不由此南湖諸孫有
行有文銘彰母教以永于聞

李英叔墓誌銘

余聞西昌李英叔其鄉茶灘啁石二陂每歲屢築已輒

壤殆不可築英叔以錢二萬緡幕千夫鑿石堤江水陂
成灌螺溪良田三十萬鄉人稱之曰李公陂又聞每歲
儉月英叔發廩數千先糴市穀一石而因其直為損十
一其妻助之又益家量十一糴者石得穀百二十升以
為常今五十年矣嗟夫以若所聞英叔又何惡歟於天
與人哉英叔以至元丙子八月十二日卒得年七十有
八其鄉人求余銘者皆稱英叔蚤孤母周年垂九十而
終孝慕不衰教子孫循循謹飭善遇族姻鄉里賓友凶

年勸分常過萬石得官承事郎同知栢興府事當上以
母老辭行好施與如橋庵航渡觀壇塔寺皆不靳英叔
美鬚髯長拂地黑白分數可數見者偉視所居住花美
木法書名畫異時寶玩徃徃歸之遠近名園不能至也
別治臺池亭館奉過使客大人至為促席移日家付予
珍珍又能遠怨其家鄉使其親享優游之福者二十年
余感昔人積善累功幾世幾年僅僅不過中人數十家
之產終身曾無一日之樂英叔起家至鉅萬比封君傾

其鄉里子孫賓客日奉觴上壽歌呼鼓吹彈繫為歡娛
以壽考終雖乘時亦盛福豈非天哉英叔諱一蜚世家
大和南岡娶胡氏子男一瑀女某孫男某女某某年某
月某日葬某鄉余又聞英叔書謂書生盡還其鄉舟人
所顛越于貨者書生感泣請以為謝英叔大笑書生奈
何教人受禦耶銘曰

富國有經小者豐家生財有道大者無涯王侯將相何
如素封為大夫種孰與朱公貧夫黷貨仍非巧宦墨以

敗官始漸負敗史傳貨殖皆壽考終歷選其人亦垂無窮嗚呼英叔身致千金傾其鄉里豈怨是任沒而可思不繫其富沒而可傳孰銘其墓斯人斯志尚克永世

安撫同知羅榮可墓碣

廬陵平江羅氏其先由豫章徙六世至榮可值大一統起家遊輦轂下遭遇聖明一日輝赫向此平江遂聞于時晚以蜀閬揚名蚤知勇退親見真人勃興為龍為光念平生教忠有子能仕以君賜歸榮日與鄉人父老歌

呼飲燕樂其天年以無忘明時大德榮可可不謂榮矣
乎狀稱榮可諱仁則方至元丙子故家巨室一日為墟
已能自異其所扶樹極救或面數責諂讓無不當謂人
心鄉黨是知四方誦之大德中因近臣以布衣見見知
延祐聖人於潛邸授分寧等處茶司提舉能執法抗郡
守以貪饕毒民者茶戶為復業上官廉得其才因極言
當罷此司竟罷遂用為權茶轉運副使以行其言至官
以嚴自律不陵長不偪同而儼然不可犯下不敢為姦

而得罷行害利如衆所欲惡九江大饑民食薇蕨會雪凍歲且不可得食民多莩出私錢七千五百緡得官米三百石救饑民千七百二十餘家以待賑貸之至分司淮浙婺源官課已重前官創增萬三千餘緡提舉司又强委儘辨文引多至五萬餘緡因頓足大呼曰國初天下茶課不過五萬餘緡耳婺源一州乃七倍國初天下民何以堪幾何不為變盡收所强委者併罷前官所增比還計各路所收已過萬引同寮持不可且得罪則身

任之曰寧我罷官無衆誤國用此名益聞以蜀閬奏有
四川威茂等處軍民安撫司同知之命議建橋白沙河
可歲救溺死者無數意止蠻獠三百戶與灌州民雜處
者得不遷諸羗安堵如故出蜀蜀亂明年入覲賜金織
二兩以歸又明年十一月十有八日以疾終於家年八
十有二訃聞贈卹有加哀榮備至娶任氏先卒子男三
子岡玉坦于岡全寧府判官先卒玉以文學稱嘗迎駕
龍翔獻所註孝經又嘗侍親入朝咸寧女三壻劉惟信

彭以南劉迪存孫男二武孫文孫女三曾孫一歲某月某日葬安平鄉之虎峯坦以季父命奉書幣拜稽首求之揭于墓余聞其鄉人云里有水源村民被誣者自言微羅公無噍類矣他如此甚衆如其才力時命能羣雄詘伏退讓由未足多惟壽富安榮雖名世貴戚大臣近侍有愧歸全若賢子孫蚤有譽能自致必不可為庸人以老則愧之者多矣使其先或有隱慝必不至此身多慚負示不及此是宜彰示後之人

闕

以勿替引之且以勸為善無怠

元封濟南路同知濱州事嚴府君墓誌銘

君諱慶字仲祥姓嚴氏世家滕州祖諱津始徙沛再徙碭考諱瓚少孤稍長奉母丁避亂關中亂定東歸家薛水上母子儉勤為生稍有餘則多以貸人貸者多不能償因過孟嘗君墓喟然嘆曰孟嘗亦人耳獨使靖郭君稱有子可乎出所藏券無新故多少皆火棄之鄉人皆高其誼妻朱氏俱年八十五以壽終仲祥追念先志思

廣繼述恐志不達則學為鑒既盡得其述則畢達其志
一視富貴賤貧而為之不遺餘力常恨不能生死人尤
好禮自家之吉凶賓嘉以及鄉族昏必用其志無徃不
周人之急終不可一介苟取諸人生無一跡涉訟庭夜
無一事不可對越有子五人曰忠以家學為檀州鑒學
曰信能力田曰敬由胄監貢吏工部掾殊祥院補外尹襄
陵清池皆劇縣皆有能聲選為臨江路推官聲益聞曰
訥由般陽路學錄教蒲臺縣曰義退耕硯之野女二人

壻顏某方某孫男四以子貴封承務郎濟南路同知濱
州事時至順元年五月也以其年七月二十卒得年亦
八十有五娶賀氏有婦德卒延祐七年二月二日年七
十有二贈恭人敬以至元四年某月某日卜吉沛泗亭
東北原自碣遷祖考妣考妣之喪而序葬之命其子某
來廬陵乞銘余感嚴氏積善三世矣敬又好學而文嚴
氏其興庸可量乎乃為之銘曰

漢祖歌風有芒碣氣一時和習千年風致嚴君有子真

沛子弟君以鑒隱功過良吏使為良相有不行志我亦
沛人由長沙徙同自芒碭而我劉氏我銘君墓維桑梓
故過而下馬以俟來者

申齋集卷十

欽定四庫全書

申齋集卷十一

元 劉岳申 撰

碑誌

奉議大夫泉州路總管府推官周君墓誌銘

儀之豫章武寧人隸華堂周氏諱天鳳有過人之資負
用世之材其博覽可備顧問其文章可為詞林史館其
言天下得失利害可入奏疏施為皆有其方用之內外
小大俱要治劇皆得其宜嘗遊京師翰林之老為文學

者御史臺之執法知大體者中書之用人識治體者皆欲得儀之以為其屬一時之名士後來皆至大官者皆推挽儀之然不能集一吏議卒墮堯庫困州縣老閩嶠坐眎諸公衮衮終以無輦轂下之跡僅僅與俗吏循資正等至令四方識與不識皆稱周儀之嗚呼此有志憐材者所共憾恨也周氏其先會稽茂族唐末有名御史中丞鎮遏九江者曰勅始家九江入宋有明經教授鄉里者曰師教徙海昏其後再徙武寧累世同居者曰世

修曾祖考諱友賢宋寧宗御書棣華堂敕旌表其門閭
祖考諱汝翼宋贈朝請郎考諱應合試別院第一以史
館抗言忤宰相官至朝奉郎知瑞州軍州事國朝贈奉
議大夫龍興路總管府治中驍騎尉追封南昌縣子妣
王氏萬氏追封南昌縣君伯兄諱天驥以童子能文試
中書第一在宋治於高安宋亡元興有功德於廬陵官
至正議大夫饒州路總管儀之周旋父兄家教五歲能
誦十歲能文通春秋大義十五為吉州路太和縣主簿

能官從廬陵鄉先生聶淳吉甫講學先生有師道教以
古人學問即日去官侍親十七喪瑞州能執禮免喪事
母萬夫人出則從先生卒業夫人寢疾草籲天乞致養
疾良已者七年然後至於大故免喪從饒州京師有怨
家子誣饒州於朝儀之叩閣陳情舉朝動色被旨下中
書直其事授撫州路金谿縣主簿未上行大司農燕公
公楠薦授管勾架閣改袁州路分宜縣丞方議科徵夏
稅儀之力言其不便始得免縣連歲水災屢請賑濟至

是民居多沒溺儀之以私財糴官米二百斛以舟載飯
臨屋山而食之如是者環邑十餘里大家始相率出米
以繼有朱某告李某歐死其徒弟者儀之廉問死者其
母其母殊不知問其鄉鄰知其地多虎復得死者顏狀
服色於其母乃率鄉丁入虎穴得髑髏缺二齒與遺棄
衣服服色如母言母見慟哭命母刺指滴血其骨皆飲
其血徐命告者刺血血不復入然後服罪李氏祠儀之
於其里及代燕公以湖廣右丞掾儀之公捐館左丞李

公世安留之會撫州路平準行用庫提領命下李公以
省檢校剡上之京師京師諸公喜得儀之交章推舉吏
議持已除必不可改儀之至官盡心其職以便細民市
賈行旅為先至大初鈔法稍變斟酌便宜民甚利之授
邵武路光澤縣尹始嚴偽鈔枝蔓之禁盱撫饒信皆接
壤始受其賜有來歸不忍去者包銀令下有田者不征
而閩無無田之富民郡以一切應命儀之力爭不可則
請分豁有田無田者定為式以上從之果報罷其不應

征者為鈔九萬緡有奇邵武所征止萬緡光澤才六百緡在官七年種桑成林民不見吏選建寧路建陽縣尹初建陽包銀歲輸六萬一千一百五十緡儀之累躋援邵武例且為過使客力言福建瀕海依山近年經理與兩廣俱免今包銀兩廣免而福建獨重民將不堪變起不測會平章於公至儀之言之尤力公還朝為江南悉罷之嘗禁民藝蔗者使藝粟倡以奉復建義庄歲積粟二千石復興考亭書院課朱氏子孫學選泉州路推官

累官至奉議大夫有德化蔣氏坐殺夫儀之察詳其夫
坐殺牛不勝淹久謀其兄靳速死其兄陰毒其飯而以
蔣氏遞進之原情論止杖罪逆賊院風子脅從九人議
當流戍儀之竟論免之先後凡為建陽泉州活江閩偽
鈔枝蔓者為多恭定丙寅考試江淞獨稱儀之能得士
天厯己巳六月縣君楊氏卒儀之以楊氏之喪歸殯于
吉之鵠山未及殯而得寒疾以十二月五日卒得年六
十有六楊氏有賢行宋四川總領伯兩之曾孫封南昌

縣君子男三志禮志行志崇女許蕭憲孫而夭孫男三女一將以庚午七月某日葬鵠山鉅瑞州墓一里而近志禮以余與父同門又深友宜為銘乃論次而銘之儀之材能達志能達事而不見聲色不拘小節而不可奪為政不好貨殖而不可儉於義嘗割田嫁兄子減米散母族喜賓客多汎愛而不為妻子明日計奉入常不使有餘退無田宅以居沒無貲財以歛可謂賢矣惜也仕不顯而施已狹去京師二十餘年知儀之者非不多又

非不顯而卒莫能以儀之顯者嗚呼其命也夫余聞尚書曹子貞叅政王儀伯舉儀之才可修朝廷任使久棄遠外又聞有安童丞相之後曰脫禾赤監泉州嘗稱一周儀之可勝俗吏百千輩嗚呼使柄用人者皆此儀之其不終老下僚也哉銘曰

以世以才而止於斯亦奚以為彼何人哉而與之夷甚者過之祿不辭少澤苟在民猶樂其貧官不卑小任苟在身皇卹其勤我銘其藏以著其志茲山之良以昌其

世

元故從仕郎吉水州判官馮君墓誌銘

自余聞永新三馮瑞其鄉想見其人及科興大馮獎翁
兩舉江西鄉稱馮氏有才子小馮翼翁兩科連舉登泰
定甲子第歷官漢陽丞湖廣照磨上猶尹有能名然骭
麟必不可獲上以非其道用齟齬坐困久之終不變衆
謂有家學老馮諱魯初名希元長余二歲晚就養城西
淨掃一室罕見其面時為余一出戶融怡如春風爽朗

如秋月有典有則無一恨事胸次意象藹如也有言其少之日嘗市故書得明珠數十悉歸其人又嘗謂友人用金幣直數萬緡錢活之於死獄終不自名一錢師友鄉先生水窓劉公講習進修務實踐不為虛譽學者爭迎致人人為盡科興嘗一試有司即棄去曰老矣付吾兒矣卒如其言初至元丁丑鄉邑兵亂大父叔父未葬而父沒於是晝夜號慟積尸中既葬大父叔父尋奉祖母母避逃山中既免而祖母母相繼即世死喪原隰喪

亂流離能於其間不廢問學迄用有成其天資仁厚為
人師與人交篤於信誠終身言動無一不顧嗚呼賢矣
其有子宜哉余嘉大馮為士君子小馮不為今之從政
者使人不知其父而視其子以為至足矧余深相知者
乎馮氏由吉州司理槃以官為家有葬其鄉登豐者曰
琬曾祖諱世昌伯祖藤州僉判安國始大有豪家意祖
諱宣子考諱文孫以韋布自藏益深密妣江氏公生寶
祐戊午國朝封從仕郎吉水州判官設以沒至元庚辰

十一月甲申年八十有三葬所居西偏竹林以其月丙午娶譚氏有淑德配其君子生宋咸淳乙丑國朝封宜人沒以至正癸未二月甲辰年七十有九葬某所以某年月日子男四獎翁翼翁次增光為叔父誠孫後次可玉先卒女二顏某龍某其婿孫男四與耕某永寅賓永新多故家大族輕財利以為常士節俠有氣槩如老馮盖四世守儒矣鄉族昏友皆曰是宜銘二子經稽顙再拜以請余誼不得辭銘曰

其外吉蠲其中塞淵德邁其年子肖其賢其歸也全其藏也堅銘永為傳

王母湯氏墓誌銘

廬陵宣溪王氏子斯覺因吾友交熙伯楊貫道踵門而見曰昔我高祖妣湯夫人於先妣為曾祖姑宋故相江文忠公守廬陵日實銘其墓斯覺葬母三年而不得銘於先生不名為人子邵武令尹楊君伯學嘗狀其行敢藉手稽顙再拜以請余惟王氏世德內行之詳見于文

字者名賢如陸放翁章文肅公鄉先生如敷文王公忠
簡胡公文節楊公近年歐陽都官劉太史余何人何足
以與於斯蓋辭之辭之久而弗獲按江文忠公誌稱湯
本殷氏有為吉州刺史者因家禾川之遺直里稱殷使
君家宋初避廟諱姓湯狀稱夫人諱聖師生而有聞於
家在父母家為賢女歸王氏公塗為賢妻公塗之家事
治賓祭必肅中更傷亂雖遷無常處而綜理有常法亂
定始去故里一舍而居遭公塗之喪終喪葬盡禮潔已

肥家歸女教男春秋無廢事族姍無間言王氏闔族稱
曰難初公塗以兄子繼至是迎其私親周給其諸父昆
弟復堂構於蕭州故址重建吳丞相潛所書耆昌堂匾
稍還宣溪舊觀而治家課孫賑饑卹貧養老疾葬流殍
亦惟日不足然猶以哭幼子斯受夫婦卧病而終卒未
八月十六日也得年七十有六子男二人女三人婚胡
巖老李尤壽胡定孫孫男女各六人曾孫男女三人葬
其鄉周原口亭子坑以壬申某月某日惟王氏世科望

族三太守先後相望蔚為三槐余猶及識潮州使君其
風流文采晚猶傾動如湯氏以貞白起家廢子孫不
失舊物可不謂賢乎銘曰

宣溪三槐百年雨露一旦忽諸惜莫知故肅肅湯孫守
志莫舊歸視其家槐有三葉于嗟女德興亡勃忽曷不
觀此堂構突兀墓木森森槐陰鬱鬱過而式者無侮無
拂

桂楊縣尹蕭憲孫妻周氏墓誌銘

余友蕭克有以其妻周氏之葬求余銘為余言周氏征東提學長孺之女年十九歸於憲孫事姑二十餘年如始至友娣姒如同氣下逮妾媵皆有恩愛每循先世故規收養棄兒必擇乳哺親在視而加廩給之多病特少歡趣獨喜得事太夫人寢疾有間則喜疾病則憂不幸至于大故周氏疾日革既葬遂却藥以死至元後戊寅十月二日也得年四十有一憲孫哀其不幸無以慰其死而塞余悲死不欲朽將在斯文敢請余聞蕭氏世積

德而賢內助為多黃夫人相鄉帥以忠厚起家嘗謂人
非甚不幸不至鬻田宅宜陰益之以照其羨費每緡錢
必加十為百萬錢加千千緡加萬矣率用此市田宅以
為常夫人生長名家嬪于德門能循法度為大夫妻教
子忠孝為名御史聞于當時彭夫人喪御史方盛年而
有柏舟之志撫三子皆異母而有鴈鳩之德故自御史
之亡至于今三十有八年而家道如一日子婦又見周
氏焉克有今為彬州路桂陽縣尹鄉稱御史才子子男

二祖生次奎生後其季孚有女二婿劉觀次許賀鑑某
年月日葬廬陵儒林鄉之尚禮銘曰

惟婦德內實家之腴匪婦德由諸侯大夫是故召南
其應騶虞惟茲蕭氏積德不渝高曾祖禰世濟其翰我
銘女士輝于女史貽厥孫子

劉一飛墓誌銘

吉水折桂劉氏其先見余所誌萬翁墓詳矣萬翁有賢
行幼孤善視叔父善睦族善居鄉其從弟謙翁自其父

與余還往再世至是以其孫一飛年十五為殤子緣世
好求余銘以塞其悲一飛自幼已見稱奇童至正甲申
生十有四年矣請大父父必試鄉闈大父父不能止也
比入院省憲達官疑其年召而詰之應對不懼已奇其
材又詰之曰孰使汝來曰聲教所暨聞風而來益奇其
對試畢投卷讀者驚異出門有執其手而識其姓名者
自是愈益力學明年乙酉重九後七日以一疾至于不
幸大父父哭之慟母李幼受書吾兒復因外家以請其

辭尤哀或疑殤子何銘余謂魯人欲勿殤重汪錡問於
聖人聖人許之且曰能執干戈以衛社稷欲勿殤不亦
可乎一飛能執筆以戰文場勿殤可也銘之曰
嗟爾一飛吾銘其藏莊生有言莫壽乎殤

張先傳墓誌銘

吉水堤平張氏自外固徙今三世矣由外固初祖十五
世至堤平譜稱上距曲江十七世見趙儀可志伯修甫
墓云伯修諱進德魁偉岸識度絕人機畧尤深善言行

必依于厚常拔人死地以為當然方內附初刑新用重鄉隣而有闕輒以寇論註誤輒附死伯修所全活甚衆所完復民夫婦父子不知名其間毀家以當供億剝牀以奉誅求何限而教子孫禮賓師如承平愈益有又何裕也其子諱籌無改於父鄉稱景良者如伯修其孫諱務志無忝乃祖鄉稱先傳者又如景良於是堤平三世又自為初祖修之不已將復為曲江又可量哉余識先傳時年未二十許厥後東西南北不相聞去年獨聞其死

今年甫識其子每得其鄉人之稱先傳者曰自其身以
及其家自其家以及其族里昏友凡履常處變修好禦
務壹守大父成式以奉親懼以為家訓餘事為舉子業
見舉於鄉尤嗜好古詩文招致四方名勝惟恐不及用
是生計不踈而子孫不愚每儉月常以貸為賑歲儉即
以賑為施鄉鄰惟恐其蕃衍盛大也方景良北歸寢疾
左右卧起十五年身積憂勞以至病憊及四年而竟致
大故又四年而棄老母弱子以死臨分母子父子語訣

又何悲也余讀王君吾素所為狀使人廢卷孰知生斯世為斯民有不得以天年終者多矣是家世積忠厚為豐家而方來未艾又在其後之人謂天夢夢何也人有常言牆薄亟仆繒薄亟裂酒薄亟酸凡薄未有能久長者是故玉長短大小價同惟厚者價百倍厚固當貴重如是耶娶蕭氏子男四欽鉉鑑銓女一媚王貫孫男女四生至元壬辰六月十八日卒至正壬午四月六日得年五十將以某年月日葬其鄉某里欽來請銘曰欽之

先人嘗及門矣其季弟銓之婦翁李直又助之請銘曰
惟地持盈海晏河清惟地載重不難不踈厚德者長順
德者昌厚德以殃逆德以亡惟茲張氏曲江尚矣匪胄
遥遥惟富無驕惟堤之平如月哉生又如居諸與歲俱
除來日方將以莫不減子孫孫子富於文史銘揚其美
自今以始

蕭熙明墓誌銘

廬陵在宋科盛時通藝者抗四方工詞賦者抗三山詩

學最盛吉水吉水推文昌蕭氏余受詩家庭辱知衡州
推官與其弟甲戌進士一門興詩如漢匡韋衡州有子
當宋亡科廢教子孫不廢學故科興而子孫世科亦不
絕於是世為通家君諱如愚字熙明於衡州為季伯兄
早世與仲兄采熙績元其家學仲亡君尤自彊終身不
可一日不競平居退然一臞儒應門獨立天姿彊明必
不可為弱而昧者此其所以興也君事親無不自致其
所當盡者事兄如父不辭難嘗曰弟有子職弟子職當

如是身所率先惟敏於事勸於學日孜孜焉雖賦役無寧歲而從容有常雖幹裕無虛日而講習不輟故家事治家教肅而外禦給客至傾倒雖盛寒暑不變又不獨應俗出至談迂濶尤加禮貌所與平生深交館穀不出其門所甚愛故人子甚如其子老友劉實翁晚貢於鄉其子震早登上第君喜過折屐遇羅氏兄弟亦然其天性彞好也延佑初科仲子立夫為伯兄後者登乙卯第授南豐州判官孫霽天厯己巳舉於鄉一門彬彬雖科

暫廢常如興時鄉人父兄子弟至今敬教勸學以君為
法嗚呼如君可不謂賢乎君嘗捐田三百石助里人役
費未死然由欲擴而充之鄉黨宗族皆稱曰賢使君用
世世亦用君惠且施族有政矣曾祖諱日躋祖諱深見
鄉先生楊伯子所為廸功誌銘考諱符世衡州府君也
娶王氏先卒繼孫氏後君數月卒子男五鼎孫立夫道
孫壽孫宗孫立夫從孫先後卒女一適王氏先卒孫男
九女十一曾孫男六女三君與余同生宋景定庚申沒

以皇元元統壬申七月年七十有三諸子謂余宜銘銘
曰

學如力穡是名學殖孰有不學而家不落惟茲蕭氏世
有肅心夙夜競勸以莫不欽天之所啟莫能閉也子孫
孫子尚勿替也

元故三公府掾鄧克順墓誌銘

鄧氏由汴徙家撫之金谿五世再徙吉之吉水鄉為中
鵠里為小陂里孫氏世積善為甥舅家君諱愷字克順

由孫氏子繼鄧氏以親親長長聞於其家善事王父母
父母無一飲啜不盡勸比及喪葬祭無一節不盡禮於
其私親又無一不用其至自親昆弟至於堂從無一日
不咸自族里昏友無一語不讎皆曰難弟克順其順矣
乎天性倜儻一言可以立棄千金終身不可苟取一分
其中心嗜好誠乎為善甚於酒色貨財使人人皆如克
順天下平治不難諸公貴人聞其賢爭辟為三公府掾
明日以疾卒臨終正衣冠如常顧謂左右今日必雨兩

時吾當逝矣已乃果然蓋至正乙酉七月丙辰也得年四十有一君雅好遊嘗泛海東至于日本南至于交趾廣河北至于京又北至于上京胸次意氣故不可齷齪不能五十又不可延數日之命卒以客死上京聞者皆哭失聲殯之日巷哭道祭塞路出都門送者千餘人行道神傷曾祖如海祖應和父貴文妣戴氏娶曾氏子男三鏞鐔鐸女二季釗壻彭明恕次叔真孫男一源女一蠟娘余始與克明莫逆君諸兄也晚與君有連甥孫為

其子舍兒子文華又同客京城多倡和讀書常過夜分葬仁壽鄉上槎厥富山以十二月三日銘曰

一鄉之士可友之以為善三公府不可得之以為掾男
子四方子何非死所遊魂濕子上京雨歸斯復子姜吾
土嗚呼順甫

將仕郎韶州路知事蕭府君墓誌銘

禹鼎諱瑞姓蕭氏世家吉水虎溪嵩華山之下蕭氏世
科故家至禹鼎始遷廬陵之馬塘距忠簡胡公丞相文

公故第為近蓋擇而處之遂為馬塘蕭氏鄉先生須溪
劉公扁其室曰嵩崖示不忘禹鼎嘗遊京師集賢以其
名聞省部定從江西水補江西復從憲司試選始用為
學正封州興學歸田一日必葺封州還教授梧州如封
州梧州還授將仕郎賓州行用庫尋除韶州路總管府
知事見知宣憲兩司方被遇而以病卒于官至順辛未
五月二十二日也始死郡長貳率僚屬往哭之比喪還
賻奠有加其子達觀以其喪歸而請銘於余其詞甚悲

余少客其族里時科院蕭公獻可以風流厚薦為鄉丈
人一門群從多知名者禹鼎二父際南北初混方遊秦
淮北關中原始盡更其故所居以科院領客而落之屢
造焉科院即世群從相繼淪沒盛年以主簿死曲江者
余友周遠也今又哭禹鼎焉禹鼎以別業起廬陵為豐
家以三仕死曲江為中壽余銘禹鼎孰知余悲祖仲貴
從事郎淮東轉運使諮議父曰敬張氏子男五達觀達
胡達章達玄止敬女一壻文案丞相諸孫也孫男女九

葬某所以某年月日余聞禹鼎早孤事季父如父昏嫁
庶弟妹如一分財利必均二弟安裕至今日者禹鼎力
也銘曰

嗚呼曲江奪我良友嗚呼禹鼎竟隕中壽嗚呼此碑亦
墮吾淚嵩華峩峩歸來無棄

劉母黃氏宜人墓誌銘

宜人姓黃氏諱德順追封承事郎同知太和州事劉君
諱時明之妻文林郎韶州路樂昌縣尹中孚之母也初

至順壬申宜人拜命感泣承事不及見語子姪曰吾家事處州司戶府君夫人歷六世而後乃今復見之嗚呼尚矣狀稱劉氏系出定王二十五世孫義徙吉陽場之億田以進士第發身者十四人而廣西提刑諱鳳寂著廣西從弟諱鏜上溯四世祖處州司戶叅軍諱洵為進賢里梅南初祖生太和府君宋亡家廢宜人相府君起家教子力能昏嫁其群從周急其疎族屬同爨有三世者賓親旦暮至隣婦倉卒乞貸以為常終身蚕績必至

夜分子能仕初任曲江簿曹謀奉親就養不許曲江

闕

府君喪居喪有聞終喪改新會簿歷象州判鐔津尹皆
稱廉平至鐔津二十有七月棄官乞便養及樂昌命下
將行而宜人至於大故族婣鄉黨知其平生者無不追
悼痛惜生宋咸淳丙寅十二月十二日終元朝至正壬
午十一月二十二日得年七十有七明年十一月癸酉
葬廬陵儒行車鼓之原子男一中孚孫男女各四曾孫
男女各一先葬中孚請曰臨川先生吳公幸銘太和府

君若不得先生銘吾母是重不孝也敢泣血以請惟先
江陵府君與廣西同年樂昌又辱與遊三仕不辱其先
嶺海不欺其志讀奎章虞公所序梅南詩受其文詞故
為之銘銘曰

夫也良士子兮良吏賢妻賢母斯丘斯志過而下馬無
傷其拱把

承德郎武昌路推官馬君墓誌銘

馬氏其先幽州薊人宋樞密正惠公知節判鎮州一子

留家鎮之黨城縣廣楊里其後宋去汴南徙子孫不仕
金金末有諱增者魁岸雄奇有勇略尚氣節鎮將檄為
裨副不就盡以祖父貲產讓其兄子進而已之鄰邑鼓
城縣買田築室焉遂為真定路晉州縣人鼓城者春秋
鼓子之國也有子四人其季諱良善事父兄是生武昌
府君諱忠信家順鄉君自兒時鄉里皆稱其有祖風至
元甲戌江淮軍需繁急侍郎無極楊公某以時名來為
晉州君被謀選其供億最先辦而鄉人不知楊公入朝

首以君為賢而薦之會建閩省為閩掾見知叅政史公
弼公以治法征謀自任然必咨訪而後行居閩二年力
薦君材可大用君將之京盡以鄉人之喪至自閩而各
歸其所親會省部例降嘗任江南者授君漕漕鹽司管
勾君不較至官修其法去其弊盡給民工本而鹽課自
足先是鹽司裹鹽以誣民為私鹽立破民家至是君悉
禁止之竈戶有嫗衣濡裳而訴其子下之於水者君視
其履襪俱燥怒曰汝不墜水而以惡逆誣而夫之子不

仁嫗退果繼母也史公宣慰浙西置君閭幙時權臣奸黨肆為凶虐君退吳山之下至元辛卯旨下浙省鞠訊其黨史公為右丞左丞董公仕選舉君治其獄有西域僧領江南釋教者其罪惡最大而繫援最強爭欲釋之君略不少貸而盡得其情未幾其子以行宣政院副來取嘗訟其父者殺之而終不敢一語及君明年以兩淮隸汴建汴省中書移選浙省掾奉圖籍於汴衆舉君至即為戶曹有蒙古軍人訟其富驅背主議下所屬以驅

還之君視牘其父已放之為民矣詰之曰子安得背父
抑良為驅有官族子訟其季奄有其兄若弟絕戶財產
君命均分之而共其役師伐南交諸路當供鎧仗有宣
慰淮西者勲巨之胄素驕蹇議以君董其役至即語其
屬曰誤軍需者法當死敢不畏死翼日來見且饋蒸糕
君盡以食衆工鎧仗立具授承事郎蘄州蘄水縣尹蘄
產竹歲貢簾條官役民負竹詣郡吏因為奸則請降條
式而縣為條以進諸縣得以為例每勸學邵農不為文

具置社學由先風化嘗一新公宇而民皆不知此滿借
留者數百人改潭州路推官有少婦誣其繼母昔毒其
父今與奴私因殺男妾以滅口在繫又嘗生子宣慰司
趣其成獄乃與繼母爭家貲不獲父死後母嘗誤殺妾
因取他人兒為母姦生子君得兒父母所言故所與兒
祿證之婦然後服他所訊獄多此類官滿貧不能歸留
潭州以至大己酉五月二十八日卒於潭潭人哭之哀
其秋授承德郎武昌路推官至治壬戌六月某日歸葬

鼓城升平鄉祖塋之次君通經史熟唐律性剛正不畏
後禍嘗許當世以馳驅然官止六品年五十僅過二所
施狹矣娶耿氏同郡萬夫長之女有婦德中外百口稱
其孝敬祖姑李氏尤愛之教子孫有法後君十有八年
以泰定丙寅六月二十一日沐浴更衣而終某年月日
合葬於君之兆子男六欽吉安路總管府照磨銓挂陽
巡檢先卒鎬銳鑑釗女四壻百夫長汴梁鄭某河內牛
某承務郎攸州判襄郡趙某幼早卒孫男一女三欽讀

書知大體有長材善論事與余游求余銘余惟正惠公
歷事宋太祖太宗真宗以直聞面折王欽若丁謂輩於
上前子孫義不仕金待聖朝而後仕仕雖未顯其將在
欽與後乎乃為之銘曰

天之將爽必先以昧物有顯時中必甚晦侃侃正惠直
聞天下子孫在金終無仕者世有偉人在晉仕國待時
休明歸於有德當官無畏故不卑官臨事無畏亦罔後
艱惟其不疚是以不憂惟其憂悔是以寡尤不達不年

則不敢知有子而賢天實報之孰厚其積而闕其光斯
銘斯藏世世其昌

張氏墓誌銘

余友許有孚可行誦其妻張氏之賢由其家訓父母身
教故為張氏賢女既嫁見愛於魯郡太夫人友於其伯
仲叔姒為許氏賢婦惜也有四三年離憂之懷而無終
歲室家之樂以死誦荆公一日歸行有可傷心者焉張
氏生十有四年而許嫁又七年而始昏其冬有孚將上

春官明年蒙恩賜進士以歸明年五月魯郡太夫人不幸終于仲兄維揚之官所有孚奔走南北因二兄克襄大事終喪從有孚提舉湖廣儒學檢校行中書迺由力疾哭太夫人甲戌忌一慟失聲而疾病以八月七日生一女而卒後十五日女亦亡孚感其契闊而遽有死生之分也先生以父兄執友幸而賜之銘張氏死且不朽余與許氏通家再世天厯乙巳及見可行以新昏歸寧其後出處無不與聞又安得辭乃序次而銘之張氏世

家大都檀州祖某贈某官父某奉訓大夫茶陵知州張氏死時年二十有六可行為之齋衰期銘曰憂樂違行不可齋而樂是違死生契闊不可知而死是期我銘如史以永之子生者之思來者之垂

張元英墓誌銘

平里子姓張氏諱俊大字元英世為蘄州蘄春安平里人自號平里子宋故兵部尚書晏然之從子通判江陵軍府正大之季弟也少孤依江氏娣南徙渡江家於淦

水季斬為清野湓戶口日增江閫建景星精舍以養淮
蜀士平里子繇精舍始知名宋亡用寡時自振能不落
其故家壻蔡氏蔡制閫幙屬也蔡死不忍更娶蔡氏義
以段氏女繼其室凡二十有七年與蔡氏同居如一姓
義不分蔡氏貲產蔡氏必欲分與之而終不忍言平里
子不逮事父母悉推讓先疇以與其親昆有竊據蔡氏
田者有謀取段氏田平里子皆悉心與力助之歸田至
蔡氏誼以田償更棄券與段氏其平居赴人之急有甚

已已未衣食念人寒饑義不先已後人其素所蓄積也
衆謂平里子逮事二親有不為孝子者乎使平里子與
親昆弟同居顧肯出張公藝下耶平里子如得志於時
者仁其三族不難也又肯取非其有乎平里死十有一
年矣其子鑑能繼其志與蔡氏無間言至今能揚其父
之美使不遂泯沒鑑始來廬陵翰林學士臨川吳公以
書遺余曰吾徒也至是以景星書院山長滿改葬其父
以吳公命來徵銘曾祖權道宋鄉貢進士妣項祖祓宋

迪功卽妣許孝武子妣表子男四鑑鉉鎮銓女二孫男
五師道履道首道觀道升道女一平里子死時年六十
有二葬吳源今與蔡氏合葬鳳岡銘曰

士有隱德而顯維時其身已矣其子逢之匪其子逢隱
德之功孰顯是者惟臨川公公實命我子銘其藏嗚呼
平里猗歟鳳岡

元從仕卽同知全茗州事賀府君墓碣

故友江西提學蕭禹道讀書工詩有節俠氣骭髀不可


諧戾契取自致平生四海惟燕國材右丞間居鄉評物
論嚴如史筆間為余歷選群從之良諸孫之盛亟稱賀
性翁余知性翁始此性翁諱士貴系出永新良坊賀氏
由唐洪州史君泰天祐中死封疆廟食象牙灘至今有
賀使君廟子孫散處安成衡陽夷陵為世科巨室去良
坊三舍而徙龍田者諱弁以詩賦稱其鄉世為守儒玄
孫諱宋武字憲仲娶蕭氏生二子長曰公武季曰震亨
以季為母舅後而公武死憲仲不嗣震亨有大志負其

材能自拔興以大其母家而以季子紹賀氏是性翁性
翁嘗遊都城歷十餘年多識諸公貴人多贊其材嘗一
再被命司知州事由將仕陞從仕順隆改全茗嘗以近
臣薦典中心閣久之又嘗從近臣見延祐聖人於便殿
雖特旨不奪吏議亦久客倦遊念遠道多致異味時蓄
善藥常急足馳寄奉老母至是浩然賦歸日奉甘脆跪
起歌呼上壽為娛悅自父族母族富安周急養老慈幼
一用其至及門必盛饌痛飲必至醺別去贈賄必盡情

奉客尤謹必盡歡遇儉歲必賑貸其鄉凡耕其田者動以萬計至順庚午募入粟與流官固不待勸而分隱民食其粟者數千家郡議以聞則以老母辭省部定以孝義旌其門其鄉龍溪為江西河南要津每歲為浮梁輒壞尤病朝涉復捐錢數萬緡伐石為長橋壓以大木蔭大屋度可支數百歲江湖兩界實利賴至一不與外事不侮奪人不閔有司教子恂恂讀書應門無或險危其大人死之日棄老母不終養又恨未割田為祀田為

義學屬其子必繼其志娶趙氏故宋宗室賀州同知某
之女子景文貳教曲阜次迪官學湖湘女四孫男四女
三性翁嘗為祖父母父母及其私親建龍山寺供佛
鉢僧又為雲峯寺捐財歸田作新寺還舊僧凡費楮幣
萬緡寺有羅漢達奚為永新上剎其用甚遠余讀性翁
所錄賀氏家譜愛其考覈謹辨證明得其族屬繁世科
久又見鄉先生自歐陽都官劉太史鄧禮部諸公所為
文字蓋忠臣遠孫文儒故家其所由來者漸矣性翁起

豐家芳年京國熟世情偽晚更夷曠歸老醉鄉以天年
終其見遠識微類古所稱蚤知之士禹道真知人哉余
友揭曷碩既銘其墓貢士馮子將復叙其事求余文揭
之墓上使世子孫無忘來者有考云



申齋集卷十一